

## Data penerima PSP selamat



KUALA LUMPUR 31 DISEMBER 2018. Penetapan harga minyak petrol dan diesel ditangguh sementara buat masa ini ketika tinjauan di Stesen Shell Jalan Bangsar.  
NSTP/AZHAR RAMLI

### BERNAMA

MASALAH kebocoran nombor akaun bank penerima Program Subsidi Petrol (PSP) yang terdedah di portal rasmi PSP sebelum ini sudah selesai dan keselamatan data penerima adalah terjamin, kata Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail.

Beliau berkata langkah pembetulan sudah dilakukan ke atas portal itu oleh pasukan kementerian yang bertanggungjawab dalam masa beberapa jam selepas masalah itu dilaporkan.

"Masalah itu berlaku dalam tempoh yang tidak panjang dan ia sudah segera diperbaiki dan sistem itu berjaya dilindungi serta keselamatan data penerima adalah terjamin," katanya kepada media selepas merasmikan Hari Sukan Keluarga Kementerian Perdagangan Dalam Negeri dan Hal Ehwal Pengguna (KPDNHEP) di Bangi, hari ini.

Semalam, Menteri Komunikasi dan Multimedia Gobind Singh Deo berkata, pihaknya masih menunggu laporan KPDNHEP berhubung nombor akaun bank penerima PSP yang terdedah di portal rasmi PSP.

Bagaimanapun, Saifuddin Nasution berkata, tiada laporan perlu dibuat kerana beliau sudah berhubung dengan menteri dan memaklumkan bahawa masalah itu sudah diselesaikan.

KPDNHEP dalam kenyataan sebelum ini berkata, pihaknya sudah meningkatkan sistem dan keselamatan data laman web sebelum mengaktifkannya semula untuk diakses orang ramai.

Dalam pada itu, sebagaimana diumumkan menteri tersebut sebelum ini, seramai 2.9 juta penerima Bantuan Sara Hidup (BSH) daripada golongan B40 yang layak menerima bantuan PSP boleh menyemak kelayakan mereka melalui portal [psp.kpdnhep.gov.my](http://psp.kpdnhep.gov.my) bermula 15 Oktober.

Beliau berkata lebih 1.6 juta hits diterima dalam masa tiga hari sejak portal itu dilancarkan.

“Untuk tiga hari pertama sehingga 17 Oktober, sebanyak lebih 218,000 permohonan PSP yang layak dan dikemas kini dicatatkan oleh portal terbabit,” katanya.

Beliau berkata, jumlah itu menunjukkan bahawa kepentingan portal PSP untuk memastikan golongan yang layak berada dalam senarai menerima bantuan bersasar berkenaan.

“Fokus kementerian sekarang adalah memastikan agar tiada yang tercicir, jadi kita mengajak rakyat untuk semak di portal dan semua talian KPDNHEP bagi mengemas kini maklumat mereka,” katanya.

**Artikel ini disiarkan pada : Ahad, 20 Oktober 2019 @ 11:18 AM**

